

Cjarte europeane, cuasi a bon la ratifiche

L CONSEI DAI MINISTRIS, DOPO agns di spiete, al à ratificât, cun delibare dai 9 di Març, la Cjarte europeane pes lenghis regionâls o minoritariis, fate buine tal 1992. Une decision che «se e vignarà ratificade dal Parlament e sarà un grues pas indevant pes minorancis e pal stât talian», al dis il diretôr de Agenzie regional pe lenghe furlane, William Cisilino.

La particularitât de Cjarte europeane «e je che il Stât al pues decidi ce tipo di tutele adotâ par ogni minorance tutelade e cuant che al decît alc, chel al devente vincolant – al zonte Cisilino –. Come strument internazionâl, al è, duncje, un dai plui avanzâts in vore dentri dal Consei d'Europe».

La Cjarte europeane pes lenghis regionâls o minoritariis e je un dai documents di fonde pal rispjet dai dirits linguistics des comunitâts minorizadis che il stât talian al veve firmât tal 2000, ma nol veve po ratificât. Là che la mancjance de ratifiche «e impideve di meti in vore i principis de Cjarte intal stât talian – si lei sul blog dal Comitât 482 –. Tant par fâ un esempi, la mancjance de ratifiche e jere stade doprade (in maniere dal dut strumentâl e cence fondis) par motivâ il fat che la Rai no meteve in vore la leç statâl 482/99 che e garantîs spazis pes lenghis minoritariis ricognossudis dentri dal servizi radio-televisîf public».

Sodisfate ancje la retore de Universitât dal Friûl, Cristiana Compagno, che e spere che cumò «a cressin ancje i nivei di tutele e lis risorsis par tutelâ il patrimoni linguistic e, duncje, storic e culturâl dai territoris».